



食著藥，青草一葉

我做電腦工課三十外年，嘛予電腦凌治(līng-tī)三十外年。兩年前，我佇師大開發網路軟體，自設站開始，我就防毒軟體不離身，網站開張(khai-tiang)成(tsiānn)半年，嘛平安無事，煞佇半年後中毒。

解毒的頭一步就是掃毒，我用五種軟體落去掃，無結果；重灌操作系統、重裝軟體，無結果；開錢將『磁碟機』做上低層(kē)的格式化，無結果；重複幾若擺，猶原無結果。

目一瞞半年過去矣，佇我咧欲掠狂進前，想著一个巧步，就是報案掠歹人。我敲電話予網路警察，誰知影警察講個辦刑事案件，無管商業代誌，我聽一下強欲倒塌坐(tò-lap-tsē)，今(tann)火化(hué-hua)去矣，我上尾上尾的尾步嘛無去矣！警察大概聽出我的哀怨聲，安慰我講會當佇網路頂，揣資安公司鬥相共。

我用資安兩字落去揣，有影是公司一大掙。其中一个機關引起我的注意，伊就是「臺灣學術網路危機處理中心」，我恰伊聯絡，果然正確，因閣是公家機關，師大是囡的管區，免錢。因將電腦做遠端(hñg-tuan)操作，看著游標佇螢幕頂跳來跳去，親像司公(sai-kong)咧畫符作法，看來有一點仔希望。伊作法煞，就講明仔載來看結果。隔轉工伊入來網站檢驗一番，就宣佈解毒成功，原來是我用的免費網站軟體有破拍(phua-phah)，將其中一个檔案剷掉就百毒不侵。

有影啦，自彼工了後，已經一個月囉，見擺到網站去共伊請安，看伊平安順序，我就心涼脾土開(pī-thóo-khui)，半年的惡夢，就親像冊(siap)九日烏見著大日頭，規个攏散了了矣。這予我想著一句話：「食著藥，青草一葉；食毋著藥，人參一石(tsit-tsiòh)。」食著藥，一葉青草就見效，食毋著藥，較濟的仙丹寶藥嘛無效。我揣著高手，伊一下拏(so)就平波波，我半桶師家已來，煞佇電腦房裡撻獅尾螺(séh-sai-bué-lê)撻半冬，真是命星烏暗。

作者：邱文錫

☆詞彙學習☆

- | | |
|------------------------------|---|
| 【凌治】līng-tī：凌虐 | 此處比喻數量多 |
| 【倒塌坐】tò-lap-tsē：跌坐在地，極為失望的樣子 | 【一下拏平波波】tsit-ē-so pēnn-pho-pho：一出手就把事情解決 |
| 【火化】hué-hua：火熄了，沒指望之意 | 【撻獅尾螺】séh-sai-bué-lê：小狗繞圈子追自己的尾巴，喻事情團團轉，繞不出重圍 |
| 【破拍】phuà-phah：破綻，漏洞 | 【命星】miā-tshenn：民間說法，星辰代表某人，其明暗顯示此人的運勢興衰 |
| 【冊九日烏】siap-káu-jit-oo：四十九天下雨 | |
| 【一石】tsit-tsiòh：容量單位，等於十斗， | |